

Skýrsla prests

Íslenski söfnuðurinn í Noregi – 2009

Prestsþjónusta Íslenska safnaðarins í Noregi var á síðasta ári með nokkuð hefðbundnu sniði. Áhersla hefur verið lögð á að landsbyggðin fái að njóta gesta og tilbreytingar í messuhaldi til jafns við Óslóarsvæðið. Það sem stendur upp úr eftir árið eru miklir flutningar Íslendinga til Noregs. Birtist það helst í auknum sálgæslusamtölum, ráðgjöf sem og fyrirspurnum s.s um búsetu- og atvinnuskilyrði. Brugðist var með þeim hætti að opnaður var upplýsinga sími og sett á laggirnar tilrauna verkefni sem fól í sér samstarf við íslenskan sálfræðing. Aukning í sálgæsluviðtölum prests var mjög mikil milli ára 2008 og 2009. Skal þó tekið fram að undirrituð þjónaði ekki frá 15.febrúar – 15.ágúst 2008 vegna fæðingarorlofs. Það skekkir samanburð milli ára.

Guðsþjónustur og helgihald

Messað var á einum 11 stöðum árið 2009. Þeir staðir sem heimsóttir voru á árinu eru: Ósló, Drammen, Stavanger, Bergen, Þrándheimur, Tromsø, Skien, Geiló, Balestrand, Gautaborg og Reykjavík. Þeir aðrir staðir sem hafa fasta tengiliði og farið hefur verið til þegar óskað er eftir eru: Fredrikstad, Kristiansand, Molde og Karmøy. Nýr tengiliður bættist í hópinn frá Skien á árinu og er í deiglu að stofna þar Íslendingafélag.

Haldnar voru 23 kirkjuguðsþjónustur, 28 bæna- og/eða helgistundir og 26 barnaguðsþjónustur.

Guðsþjónustur og helgihald var ágætlega sótt, mæting var allt frá 30 til 290 manns. Á flestum stöðum var mæting á bilinu 40 -90 manns. Mest hefur fjölgað í messurnar í Stavanger. Við skipulag á guðsþjónustunum um landið eru tengiliðirnir ómissandi sem fyrr. Þeir aðstoða m.a við að bóka kirkju, gera auglýsingar, sækja prest á flugvöll (ef þarf), sjá um að hringja út og minna á messuna og að sjá um að halda utan um messukaffið á eftir ásamt Íslendingafélagunum. Þessi aðstoð tengiliðanna er ómetanleg og er hér þakkað sérstaklega fyrir það. Tengiliðirnir eru oftast en ekki formenn Íslendingafélaganna eða starfa náði með þeim.

Safnaðarstjórn kom með presti til Tromsø í mars og hélt þar vinnufund og tók þátt í messuhaldinu. Mikilvægt er fyrir landsbyggðina að sjá framan í þau sem mynda safnaðarstjórnina. Ein úr safnaðarstjórn er einmitt búsett þar nyrðra.

Hera Björk söng í messu í Bergen í mars. Söng hún þar af sinni alþekktu eurovision snilld, þá nýbúin að hreppa annað sætið í Grand prix í Danmörku. Við erum stolt af því að taka á móti henni nú í maí er hún keppir fyrir Íslands hönd í Eurovision hér í Noregi.

Prestur ásamt nokkrum íslenskum konum tók þátt í **alþjóðlegum bænadegi kvenna**. Þeir söfnuðir sem halda til í Nordberg kirkju komu saman og skipulögðu bænasamveruna m.a frá

Epíopíu og Kína. Stundin fór fram á norsku og ensku og er eina samkirkjulega samstarf sem söfnuðurinn tekur þátt í. Það er stórbrotin upplifun að koma saman til bænahalds í þessu samhengi.

Ragnheiður Gröndal og hljómsveit fóru með presti til Stavanger í maí. Var þeim tekið fagnandi enda settu þau skemmtilegan þjóðlegan blæ á messuna.

Íslenski söfnuðurinn í Svíþjóð hélt upp á 15 ára afmæli safnaðarins í september. Prestur þjónaði í afmælistressunni í Gautaborg ásamt sr. Ágústi Einarssyni presti í Svíþjóð, prófasti sr. Jóni Dalbú og norrænum prestum staðsettum í Svíþjóð. Messan var í lok námskeiðs sem haldið er árlega fyrir leiðtoga í barna- og unglingastarfi sem skipulagt hefur verið af Biskupsstofu.

Aðventuhátíðin í Ósló var vel heppnuð í alla staði. Í ár var hluti Jólaóráttar Bach's flutt ásamt einsöngvurum og strengjasveit. Ískórinn hafði upp á íslensku tónlistarfólki sem er búsett hér í Noregi sem flutti hluta verksins undir styrki stjórn Ketil Grøtting kórstjóra Ískórsins. Sendiherrann okkar Dr. Sigríður Dúna Kristmundsdóttir flutti ávarp þetta árið.

Prófastur Sr. Jón Dalbú vísiteraði söfnuðinn í desember. Hlutverk prófasts er að hafa eftirlit og umsjón með störfum prests fyrir hönd Biskups Íslands. Prófastur messaði í Bergen ásamt presti. Ískórinn kom með og söng hátíðlega sem gerði aðventumessuna sérstaka. Einnig fundaði prófastur með safnaðarstjórn og presti í Ósló að venju.

Aðrar kirkjulegar athafnir og kærleikspjónusta

Árið 2009 voru skírð þrettán börn, 5 í kirkjum en 8 í heimahúsum. **Hjónavígslur** voru þrjár. Þrjár **útfarir** voru gerðar og fjórar kveðjuathafnir. 10 börn sóttu **fermingarfræðslu** safnaðarins veturinn 2008-09. Haustið 2009 voru skráð 23 börn í fermingarfræðslu víðsvegar að landinu.

Prestur sinnti **sálgæslu og kærleikspjónustu** sem fyrr og fór í tólf húsvitjanir og sjö sjúkravitjanir á árinu. 78 sálgæsluviðtöl voru veitt á skrifstofu/kirkjum eða hótélum (25 árið 2008) og 74 símaviðtöl voru veitt (8 árið 2008).

Sálfræðingur veitti 66 meðferðarviðtöl frá september til nóvember 2009 á vegum safnaðarins með tilvísun frá presti. Eygló Sigmundsdóttir sálfræðingur var presti innan handar í sálgæslulegu tilliti. Hjónanámskeið og sjálfstyrkingarnámskeið fyrir konur var haldið og unnið saman af presti og sálfræðingi. Framhald verður á þeirri samvinnu og námskeiðin verða í boði á landsbyggðinni næsta vetur.

Ólafúsjóður Íslenska safnaðarins í Noregi var stofnsettur 1.nóvember. Í annarri grein skipulagsskrár segir: "Sjóðnum er ætlað að mæta tímabundnum erfiðleikum t.d. í tengslum við veikindi, dauðsfall eða önnur áföll sem dunið geta yfir einstaklinga og fjölskyldur. Einnig skal kanna þörf

á úthlutun fyrir jólin. Sjóðsstjórn metur þörf hverju sinni.”. Í stjórðsstjórn sitja ásamt presti, Kristján Daðason ritari safnaðarstjórnar og Dr. Sigríður Dúna Kristmundsdóttir sendiherra.

Safnaðarstarfið

Sunnudagaskóli er nú starfræktur reglulega á vegum safnaðarins í Ósló, Drammen, Bergen og Stavanger. Ekki fékkst fólk til að hafa umsjón með sunnudagaskóla í Fredrikstad og Tromsø eins og til stóð frá haustinu. Söfnuðurinn er opinn fyrir því að heyra frá fólki sem er tilbúið að koma af stað sunnudagaskóla um landið. Við sunnudagaskólann starfa nú fimm leiðtogar. Sakarías Ingólfsson guðfræðinemi sem starfað hefur fyrir söfnuðinn í mörg ár sér um sunnudagaskólann í Ósló og Hrefna Grétarsdóttir sér um íslenskukennsluna. Helga Kolbeinsdóttir guðfræðinemi hefur verið þeim báðum innan handar í vetur. Lilja Björk Þorsteinsdóttir og Katrín Ósk Óskarsdóttir byrjuðu með barnastarf í Stavanger í haust. Í Bergen hafa umsjón með sunnudagaskólanum Helga Sigríður Þórsdóttir og Ingibjartur Jónsson sem einnig er liðtækur á orgelið þegar messað er. Svala Snorraddóttir hefur umsjón með sunnudagaskólanum í Drammen. Mikill fengur er fyrir söfnuðinn og kristni alla að fá í sínar raðir þetta góða fólk til þjónustunnar.

Leiðtogarnir ásamt presti fóru í september á árlegt **leiðtoganámskeið** á vegum fræðsluviðs Biskupsstofu til Gautaborgar. Metaðsókn var á þetta námskeið sl. haust. Mikill vöxtur er í barnastarfi safnaðanna á Norðurlöndunum. Námskeiðið endaði með mikilli hátíðarmessu þar sem haldið var upp á 15 ára afmæli safnaðarins í Svíþjóð.

Æskulýðsfélag er starfrækt þó á óhefðbundinn hátt sé. Félagar í æskulýðsfélaginu geta verið þau sem hafa náð íslenskum fermingaráldri og hafa áhuga á því að skemmta sér á heilbrigðan hátt í góðum félagsskap hvers annars og vilja halda við fermingarheitinu. Í október fór hópur af íslenskum krökkum héðan frá Noregi til Vestmannaeyja á Landsmót Æskulýðsfélaga. Ferðin heppnaðist virkilega vel fyrir utan svínaflensuföll og sjóveiki í Herjólf. Allir komu sælir aftur heim eftir vináttu- og gleðiríka ferð. Söfnuðurinn lagði mikið fjármagn til þessarrar ferðar og eins sótti prestur um styrk til ferðarinnar í Kirkjumálasjóð Íslensku Þjóðkirkjunnar sem fékkst samþykktur. Æskulýðshópur safnaðarins er hluti af æskulýðssambandi Þjóðkirkjunnar – ÆSKP.

Fermingarbörn koma frá stór- Óslóarsvæðinu, Drammen, Bergen, Stavanger, Balestrand og Molde. Fermingarfræðslan hefur farið fram á skrifstofu safnaðarins, á heimili prests, á hótélum og á tveimur námskeiðum í Svíþjóð. Eins hefur prestur verið í netsamskiptum við fermingarbörn og foreldra. Eins og undanfarin ár hittast fermingarbörn íslensku safnaðanna í Noregi og Svíþjóð í september og í maí á fermingarfræðslunámskeiði. Þessi kynni barnanna eru ómetanleg sem og öll samvinna prestanna. Fermingarbörnin hafa verið mjög dugleg við að aðstoða í messum á sínum heimasvæðum.

Foreldrahópur er myndaður eftir eftirspurn og milligöngu prests. Nokkrar konur höfðu samband með haustinu og hittust þær tvær og tvær en ekki náði að mynda nýjan hóp. Prestur mun hafa milligöngu með að mynda nýja hóp þegar eftir því er leitað og bjóða aðstöðu á skrifstofunni til að hittast.

Samvinna

Lýðveldishátíðin er haldin í Ósló í samstarfi við Íslendingafélagið í Ósló. Hátíðarhöldin eru vel sótt og hefur gefist vel að vera í og við Nordbergkirkju.

Messukaffið er framhald guðspjónustunnar. Það er dýrmætt fyrir okkur að geta sest niður kynnst ofurlítið og gefið hvort öðru gleði og samfélag. Íslendingar og Íslendingafélögin um landið eiga hrós skilið fyrir skipulag og bakstur allan.

Ískórinn syngur við guðspjónustur í Ósló. Kórinn kemur 1x á ári með presti út á landsbyggðina og syngur í messu. Ískórinn starfar fyrir söfnuðinn eins og kirkjukór og heldur uppi helgihaldi safnaðarins í Ósló með sálmasöng og messusvörum.

Prestur hefur getað leitað til **Sendiherra** og starfsfólks alls á sendiráðsskrifstofunni með hvað eina sem upp hefur komið. Sú samvinna og stuðningur sem þaðan kemur er presti mjög mikilvægt.

Þeir prestar sem starfa fyrir **ÍKE** (Íslensku kirkjuna erlendis) hafa átt með sér gott og mikilvægt samráð. Því miður hafa embætti í ÍKE verið lögð niður tímabundið vegna niðurskurðar. Það er stórt skarð sem fylla þarf og eru söfnuðirnir í sárum og leita þarf lausna.

Elsa Þórðardóttir starfskona safnaðarins, Gunnar Ingi Hafsteinsson gjaldkeri og Sturla Jónsson formaður hættu trúnaðarstörfum fyrir söfnuðinn á árinu. Formannsskipti urðu á aðalfundi í apríl, Elsa lauk störfum 1.nóvember og Gunnar Ingi hætti í desember. Öll höfðu þau starfað í fleiri ár fyrir söfnuðinn og tóku opnu hjarta á móti nýkomnum presti haustið 2007. Þakka ég kærlega fyrir vingjarnleg kynni og fyrir hönd safnaðarins þakka ég fyrir allt þeirra framlag á akrinum.

Prestur hefur sótt **samráðsfundi** trúfélaga sem Óslóarbiskup hefur forgöngu fyrir. Eins hefur prestur verið boðaður á **prestafund** hjá dómprófasti Óslóar. Það hefur verið ánægjulegt að finna sig í hópi kollega í norsku kirkjunni. Það er von mín að allt samstarf við norsku kirkjuna styrkist til muna.

Prestur hefur lagt sig eftir samstarfi á flestum þeim sviðum er varða málefni Íslendinga og tekur fagnandi á móti þeim er vilja eiga samstarf við söfnuðinn.

Ég vil þakka öllum þeim sem ég hef átt í samstarfi við fyrir ánægjuleg kynni. Megi Guð blessa allt okkar samstarf og leiða okkur fram til uppbyggingar á kærleiks- og vonarríku náungasamfélagi bæði hér í Noregi og heima á Fróni.

Arna Grétarsdóttir

Prestur Íslenska safnaðarins í Noregi